

1 YOANE

Pepa Yoane ingere muŋga panzi kalo-tawana tamâta

Yesu Kirisi ne pâri-tamâta Yoane ingere pâri ara marumbu lâ, ŋineŋga muli ingere ŋgua ŋine panzi kalo-tawana tamâta ŋgu pinde. I nde koŋa lâ, aku i ilo ndo keno panzi kalo-tawana tamâta ŋinde, kala ipatu ŋanzi tu i natu wukale. Tamâta pinde silaŋenzi ŋgu siporo tu Yesu ipâŋga tamâta mao tia, aku siporo tu nenda kiesaka nde kelekele ŋalae tia. Yoane ileleanzi laŋeŋa tamâta ŋinde, ku itula ŋgua pwataki ŋana tini-mwasa ne vetâŋa kâ. Iporo tu Maro Kindeni ilo ndo keno pa kinda, kala isupwa Yesu imâ, aku Yesu ilo keno mine nâ kala imâte ŋana kinda kâ. Mine nde ara ŋana kinda taitu-taitu ma tininda mwasa panzi tamâta rârâni.

Ŋgua Via ipâŋga nia yo

1 ¹Maka uru katula ŋgua pwataki ŋana Ŋgua Via kâ, i ŋa tonŋe tu Yesu. Lâ zo ŋinde Maro Kindeni ipulia samba wa tâno tia yo, ande Ŋgua ŋinde imo muŋgani lâ, kala ŋine i imo mine nâ. Maka kaloŋo i ku matama kamora i lâ. Maka kalea sondo nâ pa i, aku kataŋo i tini lâ. ²Via ŋinde nde ipâŋga nia yo lâ. Maka kamora i, aku uru katula ŋgua pwataki ŋana ŋinde kâ. Kala ŋine maka kaporo pwataki pa miki tu Ŋgua Via ŋinde imo via mine ku imo nâ. Muŋgani i imo kuku Tama, ŋineŋga ipâŋga nia yo, aku maka kamora lâ. ³Maka kamora wa kaloŋo ŋinde marumbu lâ, ande kala maka uru katula ŋgua pwataki pami ŋana ŋinde kâ. Maka kaveta mine ŋana duvi ŋine kâ; maka iloma tu miki ma kamo ilomi taitu kuku maka. Aku kinda tao ilonda ilâ taitu kunzi Tama kuku Natu Yesu Kirisi rua. ⁴Maka kaŋgere ŋgua lâ pepa ŋine tini imâ pami ŋana ma iveta nenda ndekâŋa ipipi ndo lâ ilonda kalonda.

Ara ŋana kinda ma toka sinâla ilo nâ

⁵Yesu Kirisi itula ŋgua pwataki pa maka kaloŋo lâ, ande kala maka katula ŋguani ndaina pwataki pa miki. Ŋgua ŋinde nde mine: Maro

Kindeni i nde sinâla, aku kondoma tonje ikeno pa i, ande tia ndo kanajo. ⁶Ambo kinda ma taporo tu, “Naŋa ao ilonŋu ilâ taitu kuku Maro Kindeni”, andeta nenda yokâŋa ikeno lâ kondoma ilo, ande nenda ŋgua ŋinde nde mao tia. Ŋgua ŋinde nde laŋeŋa nâ, ŋana tu kinda ŋandai tapono muli pa vetâŋa mao ŋga. ⁷Taitu miki kaloŋo ŋga; ambo kinda toka lâ sinâla ilo, itogo Maro Kindeni uru imo sinâla ilo mine, ande kinda tamo ilonda taitu kunzi Maro Kindeni ne tamâta. Aku Maro Kindeni Natu Yesu see izavaru nenda kiesaka rârâni piti lâ tininda, aku iveta kinda tamo tava ilonda mbâra-mbâra nâ.

⁸Ambo kinda ma taporo tu, “Nanenŋu kiesaka tonje ikeno tia”, ande kinda taporo laŋeŋa pa warakânda, aku ŋgua mao ikeno ilonda kalonda tia ndo. ⁹Andeta miki kaloŋo ŋga; ambo kinda ma tapatula nenda kiesaka pa Maro Kindeni, ande i ma iveta ikura ne ŋgua pâŋa mine. I ma iveta kie ara ndo pa kinda mine; i ma izavaru kiesaka piti lâ tininda, aku ma izavarunzi vetâŋa soki-soki ndia rârâni uru taveta ŋinde piti tona. Aku i ne vetâŋa ŋinde ma iveta kinda tamo tava ilonda mbâra-mbâra ndo. ¹⁰Ambo kinda ma taporo tu, “Naŋa munŋa aveta kiesaka tonje tia”, ande ŋinde itogo kinda taporo ŋgua tu Maro Kindeni nde laŋeŋa tamwata. Ambo mine, ande Maro Kindeni kawa ŋgua ikeno ilonda kalonda, ande tia.

Yesu Kirisi nde kinda nenda Pavilâŋa Tamwata

2 ¹Naŋa aŋgere ŋgua ŋine imâ pa miki, naŋa natunŋu wukale, ŋana isukami tu kapu mulimi pa kiesaka rârâni. Andeta miki kaloŋo ŋga; ambo tamâta tonje iveta kiesaka, ande nenda Pavilâŋa Tamwata imo kuku Tamânda, aku i uru ino papa i ŋana kinda kê. Inani Yesu Kirisi, i zuzuli tamwata. ²I tamwata ipile ne via ku imâte ŋana izavaru nenda kiesaka piti kê. Andeta i ŋandai iveta mine ŋana ivila kinda simbonda nâ. Iveta mine ŋana ivilanzi tamâta rârâni simo tâno ndoni.

Ambo tamâta tonje isama Maro Kindeni kilala, ande i ma ipaveta kuku Maro Kindeni kawa ŋgua

³Ambo kinda ma tapaveta kuku Maro Kindeni ne tukuŋa, ande vetâŋa ŋinde ma itula pwataki pa warakânda tu kinda tasama i kilala sondo ndo. ⁴Ambo tamâta tonje ma iporo tu, “Naŋa asama Maro Kindeni kilala sondo ndo”, andeta i ŋandai ipaveta kuku Maro Kindeni ne tukuŋa ŋga, ande tamâta ŋinde nde laŋeŋa tamwata, aku ŋgua mao ikeno i ilo kalo, ande tia. ⁵Ambo tamâta tonje ipaveta kuku Maro Kindeni kawa ŋgua, ande i ne vetâŋa ŋinde itula pwataki tu i ilo ndo ikeno mao nâ pa Maro Kindeni. Mâsi taituni ŋinde uru itula pwataki tu kinda tapaipa kuku Maro Kindeni lâ. ⁶Ambo tamâta tonje ma iporo tu, “Naŋa apaipa kuku Maro Kindeni lâ”, ande i ne ŋgua ŋinde ma ipânŋa kanajo mine; i ma iveta vetâŋa ara, itogo Yesu munŋa iveta mine.

⁷Niŋgu-nambwe wukale, naŋa ma aŋgere ŋgua tukuŋa wasaseki tonŋe imâ pami, ande tia. Ŋine nde tukuŋa siŋga, aku miki kakai muŋgani lâ. Miki kaloŋo ŋgua ŋana tukuŋa ŋine kâ marumbu lâ. ⁸Andeta tukuŋa kala ŋine naŋa ma aŋgere pami, ande tukuŋa wasaseki tona. Miki nemi vetâŋa ara tava Yesu ne vetâŋa ara, ande ŋinde itula tukuŋa ŋinde kilala pwataki tu ŋinde nde ŋgua mao. Ŋana tu kondoma ŋga laiti ŋana marumbu kâ, aku sinâla mao ŋinde nde imâ ipâŋga lâ, kala imo isinala nia lâ.

⁹Ambo tamâta tonŋe ma iporo tu, “Naŋa amo lâ sinâla ilo”, andeta i uru wisi nâna pa ninambwe kalo-tawana tamâta tonŋe, ande i imo lâ kondoma ilo yo. ¹⁰Tamâta ea uru tini mwasa nâ panzi ninambwe kalo-tawana tamâta, ande i imo lâ sinâla ilo, aku kelekele tonŋe ŋana iveta i pata ndue kâ, ande tia. ¹¹Aŋga tamâta ea uru wisi nâna pa ninambwe kalo-tawana tamâta, ande i imo kondoma ilo ku iyoka lâ kondoma ilo. Aku izizâla tu i ilâ pa nia ndia, ŋana tu kondoma nde ipono i mata ndo lâ.

¹²Naŋa natuŋgu wukale, miki kalomi tawana Yesu Kirisi, aku ŋana duvi ŋinde kâ Maro Kindeni izavaru nemi kiesaka piti lâ. Mine kala naŋa aŋgere ŋgua ŋine imâ pami.

¹³Aŋga miki tamâta kokoŋa, miki kasama i kilala sondo ndo, inani imo muŋgani lâ, kala ŋine imo mine nâ. Mine kala naŋa aŋgere ŋgua ŋine imâ pami.

Aŋga miki tamâta limoa, miki kapole Sadana lâ. Mine kala naŋa aŋgere ŋgua ŋine imâ pami. Naŋa natuŋgu wukale, miki kasama Tamânda Maro Kindeni kilala sondo ndo. Mine kala naŋa aŋgere ŋgua ŋine imâ pami.

¹⁴Miki tamâta kokoŋa, miki kasama i kilala sondo ndo, inani imo muŋgani lâ, kala ŋine imo mine nâ. Mine kala naŋa aŋgere ŋgua ŋine imâ pami. Aku miki tamâta limoa, miki tinimi walo, aku Maro Kindeni kawa ŋgua ikeno kaika lâ ilomi kalomi. Aku miki kapole Sadana lâ. Mine kala naŋa aŋgere ŋgua ŋine imâ pami.

Kinda ma ilonda pa tâno ne kelekele ndimo

¹⁵Miki ma ilomi pa tâno ne vetâŋa ndimo, aku ilomi pa kelekele tonŋe ikeno tâno kulu, mine ndimo. Ambo tamâta tonŋe ilo keno pa tâno ne vetâŋa, ande i ilo keno pa kinda Tamânda, ande tia. ¹⁶Kinda tasama tu tâno ne vetâŋa rârâni nde vetâŋa ŋana iveta wisinda kâki wa ilonda yosi wa tapasuka tininda wa. Vetâŋa ŋinde rârâni ŋandai iyoka pa Tamânda imâ pa kinda ŋga. Ŋinde nde tâno ne vetâŋa nâ. ¹⁷Tâno ŋine ma muli marumbu, aku tâno ne vetâŋa wa kelekele mona-mona ŋine rârâni ma marumbu tona. Aŋga tamâta ea ipaveta kuku Maro Kindeni kawa ŋgua, ande i ma imo via ku imo nâ.

Yesu Kirisi ne kazâŋa tamâta nde imâ ipâŋga lâ

¹⁸Naŋa natuŋgu wukale, zo ŋana tâno ne zo marumbu kê nde imâ ipâŋga laiti lâ. Muŋga, miki kalonjo pâri tu Yesu Kirisi ne kazâŋa tamâta sakamao ma muli imâ ipâŋga. Kala ŋine Yesu Kirisi ne kazâŋa tamâta rârâ ŋinde nde simâ sipâŋga lâ. Mine kala kindâ tasama tu zo ŋana tâno ne zo marumbu kê nde imâ ipâŋga laiti lâ. ¹⁹Nia ndoyo, kazâŋa tamâta ŋinde simo kuku kindâ kalotawana tamâta, andeta ŋineŋga sipile kindâ ku silâ lâ. Taitu kinzi muŋga simo ninda-nambwe mao, ande tia. Ambo kinzi simo ninda-nambwe mao, ande kinzi ma simo kuku kindâ yo. Andeta sipile kindâ, aku silâ lâ. Mine kala kindâ tasama tu tamâta ŋinde rârâni ŋandai simo ninda-nambwe mao ŋga.

²⁰Aŋga nenda Maro Ŋalae, ina Sapâŋa Tamwata, muŋgani isupwa Koroani Sapâŋa imâ pami, ŋana itula pwataki tu ipatea miki ŋana kakai i ne walo ŋalae. Mine kala miki rârâni kasama ŋgua mao marumbu lâ. ²¹Tiambo miki kazizâla ŋana ŋgua mao kê, aku ŋana duvi ŋinde kê naŋa aŋgere ŋgua ŋine imâ pami, a? Mine tia. Miki kasama ŋgua mao marumbu lâ, aku kasama tu ŋgua mao ikura ŋana ipagugua ŋgua laŋeŋa tonŋe tia ndo. Mine kala naŋa aŋgere ŋgua ŋine imâ pami. ²²Ayo, laŋeŋa tamwata nde ea. Ambo tamâta tonŋe ma iporo tu, “Yesu ŋandai Maro Kindeni ne Pateâŋa Tamâta Kirisi ŋga”, ande tamâta ŋinde nde laŋeŋa tamwata. Tamâta ea iporo ŋgua kaŋa mine, ande i ipu muli panzi Tama ku Natu rua. Mine kala i imo Yesu Kirisi ne kazâŋa tamâta. ²³Tamâta ea ipu muli pa Yesu Kirisi, ande ipu muli pa i Tama tona mine nâ. Aŋga tamâta ea ipatula tu i kalo tawana Maro Kindeni Natu, ande i kalo tawana Maro Kindeni tona mine nâ.

Koroani Sapâŋa uru ipanana kindâ ŋana ŋgua mao kê

²⁴Ara ŋana miki ma kasaŋa ŋgua muŋga kalonjo ŋinde kaika. Ambo miki ma kasaŋa ŋgua ŋinde kaika ndindi nâ, ande miki kala ma kapaipa kunzi Tama kuku Natu rua. ²⁵Muŋgani Yesu Kirisi ipa ŋgua tu ma via mao ilua kindâ, ŋana ma tamo viânda mine ku tamo nâ.

²⁶Naŋa aŋgere ŋgua ŋine imâ pami, aku atu apananami ŋananzi laŋeŋa tamwatanzi, kinzi ŋinde situ sikai laŋeŋa pami ŋana ma kapile nemi kalo tawana kê. ²⁷Andeta Yesu muŋgani itu nzâmbe pami kala isupwa Koroani Sapâŋa imâ pami lâ, aku Koroani Sapâŋa tamwata ipaipa kumi. Mine kala tamâta tonŋe ne wurâta ikeno ŋana ipanana miki kê, ande tia. Koroani Sapâŋa tamwata uru ipananaŋi ŋana vetâŋa rârâni kê, aku i ne ŋgua ŋinde nde mao kanaŋo. Ŋinde nde ŋgua laŋeŋa tia ndo. Mine nde ara ŋana miki ma kapaipa kuku Yesu Kirisi, ikura Koroani Sapâŋa muŋga ipananaŋi mine.

Mine nde kindâ tamo Maro Kindeni natu wukale

²⁸Ayo, naŋa natuŋgu wukale, ara ŋana miki ma kapaipa sondu kuku Yesu Kirisi. Ambo miki ma kaveta mine, ŋineŋga lâ i ne zo ŋana imâ

ipânga nia yo, ande kinda ma taruru tia. Kinda ma tamandi i nao, aku ma mainda tia. ²⁹Miki kasama tu Yesu Kirisi nde Zuzuli Tamwata. Mine kala miki kasama mine nâ tu tamâta ea kinzi uru siveta vetânga ara, ande kinzi ñinde simo Maro Kindeni natu wukale.

3 ¹Mao nâ, kinda Tamânda tini mwasa ndo pa kinda, aku i ilo ndo keno pa kinda! Mine kala i io ñoa lâ tininda tu, “Maro Kindeni natu wukale”. Aŋga kinzi tâno tamâta ñandai sisama Maro Kindeni kilala nga. Mine kala kinzi sisama kinda kilalânda tia. ²Ñingu-nambwe wukale, kala ñine kinda tamo Maro Kindeni natu wukale. Aŋga lâ zo muli, ande kinda ma tamo mâsi mana. Ñinde kilalani ñandai ipânga nia yo nga. Taitu kinda tasama tu lâ Yesu Kirisi ne zo ñana imâ ipânga lâ nia yo, ande kinda ma tamora i kilala mao kanaŋo, aku i ma ilele kinda tapânga tatogo i tamwata mine. ³Tamâta ea kinzi uru sio tininzi ñana i kê, kinzi ñinde sipaveta warakanzi sondo ndo, ñana ma simo ilonzi mbâra-mbâra lâ Maro Kindeni nao, itogo Yesu Kirisi imo mine.

⁴Tamâta ea uru iveta kiesaka, ande tamâta ñinde ilaŋa ipole Maro Kindeni ne tukuŋa. Mao nâ, kiesaka uru ikai kazânga pa ñgua tukuŋa. ⁵Andeta miki kasama tu Yesu Kirisi imâ ipânga ñana izavaru kiesaka piti kê, aku kiesaka tonje ikeno pa i tia ndo kanaŋo. ⁶Ambo tamâta tonje ipaipa kuku Yesu Kirisi, ande i ma ipaveta kuku kiesaka ne vetânga tia ndo. Ambo tamâta tonje ipaveta kuku kiesaka ne vetânga, ande kinda tasama tu tamâta ñinde ñandai imora Yesu Kirisi ku isama i kilala nga.

⁷Naŋa natuŋgu wukale, miki kapakatona sondo nga. Tia ma tamâta tonje ilaŋemi. Tamâta ea uru iveta vetânga ara, ande i imo tamâta sondo lâ Maro Kindeni nao, itogo Yesu Kirisi uru imo mine. ⁸Muŋgani, lâ nia ndoyo, aku imâ lee ipânga lâ zo ñine, ande Sadana iveta kiesaka ku imo nâ. Mine kala tamâta ea uru iveta kiesaka, ande i imo Sadana natu. Taitu Maro Kindeni Natu muŋgani imâ ipânga nia yo ñana izavaru Sadana ne wurâta kê. ⁹Ambo Maro Kindeni iveta tamâta tonje ipânga itogo i natu mine, ande tamâta ñinde ma ipaveta kuku kiesaka ne vetânga tia ndo, ñana tu Maro Kindeni kilala imo kuku i. Tamâta ñinde ikura tu ipaveta kuku kiesaka ne vetânga tia ndo kanaŋo, ñana tu i imo itogo Maro Kindeni natu mine. ¹⁰Ayo, tamâta ea kinzi simo Maro Kindeni natu wukale, a? Aŋga tamâta ea kinzi simo Sadana natu wukale, a? Ñinde kinda takura tu tasama, ñana tu tamâta ea tininzi pwâka tu sipaveta kuku vetânga ara, ande tamâta ñinde simo Maro Kindeni natu wukale tia. Aku mine nâ, tamâta ea ñandai tininzi mwasa panzi kalo-tawana tamâta, ande kinzi kala simo Maro Kindeni natu wukale, ande tia.

Yesu itula tini-mwasa ne mâsi kilala pwataki lâ

¹¹Muŋgani, aku imâ lee ipânga lâ zo ñine, ande miki uru kalonjo ñgua mine: kinda taitu-taitu ma tininda mwasa panzi tininda pinde. ¹²Miki

ma kamo katogo timbunda Adam natu Kein, mine ndimo. Kein nde imo Sadana ne tamâta, aku ipu tai Abel pâta imâte. Aku i ne vetâña ñinde nde duvi mine; i tamwata uru iveta vetâña sakamao, aŋga tai nde uru iveta vetâña ara.

¹³ Niŋgu-nambwe wukale, ambo kinzi tâno tamâta ma sikai kazâña pami, ande miki ma wisimi motu ñana ñinde kâ ndimo. ¹⁴Kinda uru tao ilonda ndo ilâ panzi ninda-nambwe kalo-tawana tamâta. Aku vetâña ñinde itula pwataki tu kinda tapile mateña ne vetâña marumbu lâ, aku tapaveta kuku via nâ ne vetâña. Tamâta ea ñandai ilo ndo keno panzi i tini pinde, ande tamâta ñinde ipaveta kuku mateña ne vetâña yo.

¹⁵Tamâta ea uru ikai kazâña pa ninambwe, aku wisi nâna ndo papa, ande tamâta ñinde iregege kuku tamâta ñana ipunzi tamâta pâta simâte kâ. Aku miki kasama tu ambo tamâta tonje ipu i tini pinde pâta imâte, ande via mao ikeno pa i, ande tia. Tamâta mine ñandai tamâta ñana imo via ku imo nâ.

¹⁶Yesu Kirisi ipile tamwata ne via ku imâte ñana ivila kinda kâ. Aku i ne vetâña ñinde itula tini-mwasa ne mâsi kilala pwataki pa kinda. Aku ara ñana kinda kala mine nâ ma tapile nenda via ñana tavilanzi ninda-nambwe kalo-tawana tamâta kâ. ¹⁷Ambo tâno ñine ne mbaliña ikeno pa tamâta tonje, aku imora ninambwe tonje imo sugorai ñana kelekele pinde kâ, andeta i kalo sukâña ñana ninambwe ñinde tia, ande ñinde itula pwataki tu tamâta ñinde ñandai ipaveta kuku Maro Kindeni ne mâsi ñana tini mwasa ndo panzi tamâta kâ. ¹⁸Naña natuŋgu wukale, ambo kinda kawânda nâ taporo tu kinda tininda mwasa panzi tininda pinde, ande ñinde nde ara tia. Ara ñana kinda ma tao ilonda ilâ mao nâ panzi, aku taveta kenda ara nâ panzi.

Kinzi kalo-tawana tamâta ma siruru lâ Maro Kindeni nao, ande tia

¹⁹⁻²⁰Ambo kinda tininda mwasa ndo panzi tininda pinde, ande ñinde itula pwataki tu kinda taponu muli sondu ndo pa ŋgua mao. Mine kala, ambo ilonda itu ikai kazâña pa warakânda ñana vetâña tonje kinda muŋga taveta, ande kinda ma kalonda loko tia. Kinda wisinda ma puu ndue lâ Maro Kindeni nao, ñana tu i isama vetâña rârâni, aku i ne ilokalo ipole nenda ilo-kalo ndo lâ.

²¹Niŋgu-nambwe wukale, ambo ilonda ikai kazâña pa warakânda tia, ande kinda tasama tu kinda ma taruru ñana tamandi lâ Maro Kindeni nao, ande ma tia. ²²Ŋineŋga lâ zo ndia kinda tano pa i tu iveta vetâña tonje, ande i ma ipaloŋo pa nenda noŋa, ñana tu kinda uru tapaveta kuku i ne tukuña, aku tapaveta kuku vetâña rârâni i ilo papa ñinde tona. ²³Aku i ne tukuña nde ikeno mine: kinda ma kalonda tawana i natu Yesu Kirisi, aku kinda taitu-taitu ma tininda mwasa ndo panzi tininda pinde, ikura tukuña ñinde i muŋga itula pa kinda mine. ²⁴Tamâta ea uru ipono

muli pa Maro Kindeni ne tukuŋa, ande tamâta ŋinde ipaipa kuku Maro Kindeni, aku Maro Kindeni kala ipaipa kuku i mine nâ. Maro Kindeni ne Koroani Sapâŋa ilua kinda lâ, aku Koroani Sapâŋa ŋinde uru itula pwataki pa kinda mine tu Maro Kindeni ipaipa kuku kinda.

Ara ŋana kinda ma takai samâŋa panzi koroani

4 ¹Niŋgu-nambwe wukale, ŋgua-tulâŋa tamâta laŋeŋa râra uru soka tâno kulu silâ wa simâ wa. Mine kala, ambo tamâta toŋge imâ pami ku iporo tu, “Maro Kindeni ne Koroani uru itula ŋgua pa naŋa”, ande miki ma kalomi tawana i walele ndimo. Ara ŋana miki ma kakai samâŋa panzi koroani, ŋana ma kasama kilalanzi kâ. Ŋinenge miki ma kasama tu koroani ŋinde uru imo kuku Maro Kindeni tâku tia tâku. ²Aku vetâŋa ŋana itula Maro Kindeni ne Koroani kilala pwataki pami, ande mine: ambo koroani toŋge itula ŋgua lâ tamâta toŋge kawa tu, “Yesu Kiriŋi muŋga imo kuku Maro Kindeni, ŋinenge ipâŋga tamâta mao”, ande ŋinde nde Maro Kindeni ne Koroani. ³Ambo koroani toŋge ŋandai itula ŋgua kaŋa mine ŋana Yesu kâ, ande ŋinde nde Maro Kindeni ne Koroani, ande tia. Ŋinde nde koroani toŋge, aku koroani ŋinde nde koroani ŋana ikai kazâŋa ŋalae tina pa Yesu Kiriŋi kâ. Muŋga miki kalogo koroani ŋinde parina tu i ma muli imâ, kala ŋine imâ ipâŋga lâ, kala imo tâno kulu.

⁴Naŋa natuŋgu wukale, miki nde Maro Kindeni ne tamâta, aku miki kapolenzi ŋgua-tulâŋa tamâta laŋeŋa ŋinde marumbu lâ, ŋana tu Koroani Sapâŋa imo ilomi, aku i ne walo ipole Sadana ne walo, ina kala uru imo lâ tâno tamâta ilonzi. ⁵Kinzi tamâta ŋinde nde tâno tamâta nâ. Mine kala nenzi ŋgua nde tâno ne ŋgua nâ, aku kinzi tâno tamâta uru sipono muli pa nenzi ŋgua ŋinde. ⁶Aŋga kinda nde Maro Kindeni ne tamâta, aku tamâta ea isama Maro Kindeni kilala sondu, ande i uru ipono muli pa nenda ŋgua. Ambo tamâta toŋge imo Maro Kindeni ne tamâta tia, ande i ma ipono muli pa nenda ŋgua, ande tia. Ŋana mâsi mine kâ, ande kinda takura tu tasama koroani mao kilala, aku kinda takura tu tasama koroani laŋeŋa kilala mine nâ.

Tamâta ea tini mwasa pa Maro Kindeni, ande i ma tini mwasa panzi i tini pinde mine nâ

⁷Niŋgu-nambwe wukale, ara ŋana kinda taitu-taitu ma tininda mwasa nâ panzi tininda pinde, ŋana tu Maro Kindeni nde tini-mwasa warika. Ambo tamâta toŋge tini mwasa ndo panzi i tini pinde, ande tamâta ŋinde imo itogo Maro Kindeni natu mine, aku isama Maro Kindeni kilala marumbu lâ. ⁸Maro Kindeni nde tini-mwasa warika. Mine kala, ambo tamâta toŋge ŋandai tini mwasa panzi i tini pinde, ande i isama Maro Kindeni kilala nde tia. ⁹Maro Kindeni isupwa i Natu taituni indue imâ tâno kulu ŋana i ma via mao ilua kinda. Aku Maro Kindeni ne vetâŋa

ŋinde itula pwataki tu i ilo ndo keno pa kinda. ¹⁰Maro Kindeni itula tini-mwasa ne vetâŋa pwataki mine; muŋga, kinda ilonda ikeno pa Maro Kindeni, ande tia. Andeta nia ndoyo i ilo ndo keno pa kinda, kala isupwa Natu indue imâ tâno kulu ku imâte ŋana izavaru nenda kiesaka piti lâ tininda.

¹¹Ŋingu-nambwe wukale, Maro Kindeni ne vetâŋa ŋinde itula pwataki tu i ilo ndo keno pa kinda. Mine nde ara ŋana kinda taitu-taitu ma tininda mwasa ndo panzi tininda pinde mine nâ. ¹²Tamâta toŋge muŋga imora Maro Kindeni, ande tia. Andeta miki kaloŋo ŋga; ambo kinda ilonda ndo keno panzi tininda pinde, ande ŋinde itula pwataki tu Maro Kindeni imo kinda ilonda. Aku i ne tini-mwasa ŋinde ma ipâŋga ŋalae ndo lâ nenda vetâŋa.

¹³Maro Kindeni i tamwata ne Koroani Sapâŋa ilua kinda lâ. Mine kala kinda tasama tu kinda tapaipa kuku i lâ, aku i kala ipaipa ku kinda mine nâ. ¹⁴Kinda Tamânda io Natu indue imâ ŋana iyaute kinda tâno tamâta rârâni piti lâ kondoma ilo. Ŋinde kinda tamora lâ, aku uru tatula ŋgua pwataki ŋana vetâŋa ŋinde kâ. ¹⁵Tamâta ea ipatula ne kalo-tawana pwataki mine tu, “Yesu nde Maro Kindeni Natu”, ande Maro Kindeni ipaipa kuku tamâta ŋinde, aku i kala ipaipa kuku Maro Kindeni mine nâ. ¹⁶Mine nde kinda tasama ku kalonda tawana mine tu Maro Kindeni ilo ndo keno pa kinda.

Maro Kindeni nde tini-mwasa warika, aku tamâta ea uru tini mwasa ndo panzi i tini pinde, ande ipaipa kuku Maro Kindeni, aku Maro Kindeni kala ipaipa kuku i. ¹⁷Ambo kinda ma tamo mine, ande mâsi ŋana tini-mwasa kâ ma ipâŋga ŋalae ndo lâ nenda vetâŋa. Aku kinda ma taruru ŋana zo muli ŋinde Maro Kindeni ma ipare nia panzi tamâta kâ, ande ma tia. Kinda ma taruru tia, ŋana tu lâ zo ŋana kinda tamo tâno ŋine kulu, ande kinda tamo togo Yesu Kiriŋi tamwata imo mine. ¹⁸Mine nde kinda ma taruru tia. Ambo tamâta toŋge tini mwasa panzi i tini pinde, ande i ma iruru tia. Ambo tini-mwasa ne mâsi ma ipâŋga ŋalae ndo lâ tamâta toŋge ne vetâŋa, ande mâsi ŋinde ma isoki mâsi ŋana ilo-ruruŋa kâ piti. Mâsi ŋana ilo-ruruŋa kâ ŋinde nde duvi mine; ambo tamâta toŋge isama tu i ma muli ikai kulu ŋana ne vetâŋa sakamao kâ, ande i ma iruru. Ambo tamâta toŋge iruru, ande kinda tasama tu tini-mwasa ne mâsi ŋandai ikeno kaika lâ i ne vetâŋa ŋga.

¹⁹Nanayoni, Maro Kindeni ne tini-mwasa nde ikeno pa kinda lâ. Mine kala kinda uru taponu muli pa mâsi ŋana tini-mwasa kâ. ²⁰Ambo tamâta toŋge ma iporo tu, “Naŋa iloŋgu ndo keno pa Maro Kindeni”, andeta i uru wisi nâna papa ninambwe kalo-tawana tamâta toŋge, ande tamâta ŋinde i nde laŋeŋa tamwata. Kinda tamo kunzi ninda-nambwe kalo-tawana tamâta, aku uru tapamorai. Andeta tamâta toŋge muŋga imora Maro Kindeni, ande tia. Mine kala ambo tamâta toŋge ŋandai tini mwasa pa i

ninambwe kalo-tawana tamâta tonje, ande i ma ikura tu tini mwasa pa Maro Kindeni, ande tia. ²¹Munja Yesu Kirisi itula tukuja njine pa kinda; ambo tamâta tonje ilo ndo keno pa Maro Kindeni, ande i ma ilo ndo keno panzi ninambwe kalo-tawana tamâta mine nâ.

Kinzi kalo-tawana tamâta sipole tâno ne walo marumbu lâ

5 ¹Tamâta ea kalonzi tawana tu Yesu nde Maro Kindeni ne Pateânja Tamâta Kirisi, ande kinzi njinde rârâni simo Maro Kindeni natu wukale. Ambo tamâta tonje ilo ndo keno pa tamâta tonje, ande i ma ilo ndo keno panzi tamâta njinde natu wukale tona. ²Ambo kinda ma tao ilonda ndo ilâ pa Maro Kindeni ku tapono muli pa i ne tukuja, ande mâsi njinde ma itula pwataki tu ilonda ndo keno panzi Maro Kindeni natu wukale tona. ³Ambo kinda tao ilonda ndo ilâ pa Maro Kindeni, ande kinda ma tapono muli pa i ne tukuja rârâni. Aku i ne tukuja njinde uru iveta malia pa kinda, ande tia. ⁴Tamâta ea kinzi simo Maro Kindeni natu wukale, ande kinzi njinde sikura tu sipole tâno njine ne walo. Kinda nenda kalo-tawana isuka kinda jana tamandi kaika tapole kazânja ku tatawa tâno njine ne walo ndue.

Maro Kindeni itula i Natu kilala pwataki

⁵Ea ikura tu ipole tâno njine ne walo ku itawa walo njinde ndue, a? Tamâta ea kalonzi tawana tu Yesu nde Maro Kindeni Natu, kinzi tamâta njinde simbonzi nâ sikura tu sipole tâno njine ne walo. ⁶Yesu Kirisi indue imâ lâ, aku vetânja rua situla i kilala pwataki. I ne lââ-liliña itula i kilala pwataki, aku i see njinde ipaliñi lâ kâi popole tini, ande njinde kala itula i kilala pwataki tona. Lââ simbo nâ itula i kilala pwataki, ande tia. I see njinde itula i kilala pwataki tona. Koroani Sapânja nde njgua mao warika, aku jana duvi njinde kâ i uru itula njgua mine jana Yesu Kirisi kâ. ⁷⁻⁸Koroani Sapânja, anja lââ, anja see, kinzi jato njinde silâ taitu sipasuka ku situla njgua pwataki jana Yesu Kirisi kilala kâ. Aku kinzi jato siporo njgua kaja taitu nâ.

⁹Kinda uru kalonda tawana tamâta kawanzi njgua. Andeta Maro Kindeni itula njgua jana i Natu kâ, aku i ne njgua njinde nde kekeleke jalae tina, ipole tamâta nenzi njgua ndo, jana tu njinde nde Maro Kindeni tamwata kawa njgua. ¹⁰Tamâta ea kalo tawana Maro Kindeni Natu, ande ipakâe kuku Maro Kindeni kawa njgua njinde marumbu lâ. Ambo tamâta tonje tini pwâka tu kalo tawana Maro Kindeni kawa njgua njinde, ande njinde itogo iporo tu Maro Kindeni nde lajeña tamwata, jana tu i jandai kalo tawana njgua njinde Maro Kindeni itula jana i Natu kâ. ¹¹Maro Kindeni itula njgua mine; i via mao ilua kinda lâ, jana ma tamo viânda ku tamo nâ, aku via mao njinde nde ikeno papa i Natu. ¹²Tamâta ea ipaipa ndo kuku Maro Kindeni Natu, ande tamâta njinde ikai via mao

ŋinde marumbu lâ. Aŋga tamâta ea ŋandai ipaipa kuku Maro Kindeni Natu, ande tamâta ŋinde ikai via mao ŋinde, ande tia.

Kinda tasama ŋine; kinda ma tamo viânda ku tamo nâ

¹³Naŋa aŋgere ŋgua ŋine imâ pa miki tamâta ŋinde uru kalomi tawana Maro Kindeni Natu, ŋana miki ma kakura tu kasama sondu tu miki kakai via mao ŋinde marumbu lâ, kala ma kamo viami ku kamo nâ. ¹⁴Lâ zo ndia kinda tano pa Maro Kindeni tu ma iveta vetâŋa tonŋe, ande kinda ma taruru ŋana tamandi i nao, ande tia. Ŋinde nde duvi mine; ambo kinda tano pa i tu ma iveta pa kinda ikura i tamwata nâ ne pateâŋa mine, ande i ma ipaloŋo pa nenda noŋa. ¹⁵Kinda tasama tu i ipaloŋo pa nenda noŋa. Mine kala tasama tu i iveta pa kinda ikura nenda noŋa râŋâni mine.

¹⁶Kiesaka tonŋe ikura tu isae via ne nzâla ŋananzi tamâta kâ, andeta kiesaka pinde sikura tu siveta mine tia.^a Ambo tamâta tonŋe imora ninambwe kalo-tawana tamâta tonŋe iveta kiesaka, andeta kiesaka ŋinde ŋandai ŋana isae via ne nzâla ŋga, ande ara ŋana tamâta ŋinde ma ikai noŋa pa Maro Kindeni ŋana ninambwe ŋinde kâ, ŋana i ma ikai via mao. Naŋa ŋandai aporo tu miki ma kakai noŋa mine ŋana tamâta tonŋe iveta kiesaka ŋinde ikura tu isae via ne nzâla kâ. ¹⁷Vetâŋa sakamao kie-kie râŋâni nde kiesaka nâ, andeta kiesaka pinde sikura tu sisae via ne nzâla ŋananzi tamâta kâ, ande tia.

¹⁸Kinda tasama tu tamâta ea simo Maro Kindeni natu wukale, kinzi ŋinde sipu mulinzi pa kiesaka ne vetâŋa. Maro Kindeni Natu, i tamwata uru ikea sondu ndo ŋananzi kalo-tawana tamâta ŋinde. Mine kala Sadana ikura tu iveta vetâŋa sakamao tonŋe panzi, ande tia. ¹⁹Kinda tasama tu kinda tamo Maro Kindeni natu wukale. Andeta Sadana uru ikai poe kaika panzi tâno tamâta râŋâni. ²⁰Aku mine nâ, kinda tasama tu Maro Kindeni Natu nde imâ ipâŋga lâ, aku itula ilo-kalo ara nâ pa kinda marumbu lâ. Mine kala kinda takura tu tasama Maro Kindeni kilala sondu, inani kala vetâŋa mao warika. Maro Kindeni nde vetâŋa mao warika, aku kinda tapaipa kuku i ŋga i Natu Yesu Kirisi rua. I nde Maro mao kanaŋo, aku i nde via mao warika.

²¹Naŋa natuŋgu wukale, miki ma kapakatona sondu, aku tinimi piti ndo ŋananzi maro laŋeŋa kâ.

^a 5:16 Ambo tamâta tonŋe ipu muli pa Yesu Kirisi, ande kiesaka ŋinde isae via ne nzâla ŋana i kâ.